

Demanti opskurnih konstrukcija portala „Otisak“

4.3.2014. Sektor za informiranje Tajništva Vlade Brčko Distrikta BiH, energično demantira lažnu vijest koju je objavio internet portal „Otisak“, koji se po ustaljenom maniru poziva na izmišljene, nepostojeće izvore. Vijest kaže da su neke diplomate odlučile da bojkotiraju obilježavanje 14. obljetnice Brčko Distrikta BiH, zbog navodno neracionalnog trošenja sredstava za manifestacije povodom obljetnice.



Svake godine na Dan Brčko Distrikta BiH posjeti nas po nekoliko diplomata i visokih dužnosnika međunarodne zajednice. Tako će, po najavama dolaska, biti i ove. To se rijetko dešava drugim lokalnim zajednicama BiH, što govori o značaju i vidnoj afirmaciji Distrikta. U Bosni i Hercegovini ima preko 40 diplomatskih misija. Normalno je da iz većine njih neće niko prisustvovati pa to ostavlja prostor da vijest ovakve vrste uvjetno može biti „točna“.

Inače, diplomate sukladno diplomatskim pravilima, uz uobičajenu uviđavnost prema domaćinu, nikada ne iznose ovakve stavove. To najbolje dokazuje da se portal „Otisak“, poslužio lažima da dezinformira javnost Distrikta, kao što je to činio više puta posljednjih dana iznoseći negativne stavove i laži u svezi obilježavanja 14. obljetnice. Razlog za takav odnos je neuspjeli pokušaj reketiranja koji je ovaj portal pokušao prema Vladi Brčko Distrikta BiH, želeći da u vezi s organizacijom obljetnice dobije novac, kako bi o obilježavanju obljetnice pisao afirmativno.